





Egibar: «Zerraldoak mahai gainean jarrita neurtzen du ETak bere indarra» / 6



Amatiño: «ETBko kazetaria da Euskal Herriko independenteena» / 11



Sinn Feinekin ezik
Ipar Irlandako alderdiekin bilduko da Major Londresen / 17

EUSKALDUNON

Egunkaria

Larunbata, 1992ko Otsailak 8 / III. urtea / 364. zenbakia / Salneurria: 85 pta. / 4,5 libera

EKONOMIA

Ardi esnearen auzia

Ipar Euskal Herriko 2.500 ardi esne ekoizleak borrokan ari dira azken sei hilabeteetan agintariekin. Esnearen prezioa neurri egokian ezartzea hil edo bizikoa da laborarientzat. Gatazka honen historia eta etorkizunerako panorama marraztuz dosierra prestatu dugu. / 14

Ikastolak: «Buesak ez du bete nahi iazko akordioa»

Euskal Autonomi Elkarteko ikastoletako ordezkariak kezkatuta agertu ziren atzo, beren hitzetan, ikastolek Eusko Jaurlaritzarekin iaz izenpetutako akordioa bete gabe utz dezakeelako Fernando Buesa Hezkuntza sailburu sozialistak. Oliverirekin sinatutako akordio hura Buesak ez duela bete nahi salatu zuen Ikastolen Elkartek. Gezurtatu egin zuten ikastolak gainfinantzatuta daudunik. / 9

Frantzia ere prest arma nuklearrak murrizteko

Frantzia prest dago bere arma nuklearrak murrizteko eta EEBBek eta Errusiak armamentua gutxitzeko hasitako negoziaketetan parte hartzeko, atzo François Mitterrand lehendakariak iragarri zuenez. Potentzien arteko negoziaketak aurreratzean hartuko luke parte Frantziak. Hala ere, Frantziak arma nuklearrak izaten segiko duela berretsi zuen Lehendakariak. / 15

Faborito argirik ez gaur Euskadiko Sei Orduetan

Faborito argirik ez dago gaur arratsaldean Donostiako Anoetako belodromoan jokatuko diren Euskadiko Sei Orduetako XIV edizioan. Txirrindularitza izango da ikusizun nagusia. De Wilde-Veggerby iazko irabazleen ondoan, Donostian izango dira baita ere Bugno, Fignon, Freuler, Bontempi eta Lejarreta, besteak beste. / 18


Iruin: «Mezulari izan nintzen baina ez ETaren bitartekari»

Barne Sailak dioenez, abokatuaren zeregina ez zen izan «interesik gabea»

Iñigo Iruin HBko senadore eta abokatuak ukatu egin zuen atzo ETarentzat bitartekari lanik egin zuenik 'zerga iraultzailearen' kasuan. Iruinek adierazi zuenez, Carlos Bueren epaileak bere kontra hasitako diligentsiek ez du «bideragarritasun juridikorik».

Abokatuak esplikatu zuenez, bi enpresarik eskatuta hartu zuen parte auzian, baina «mezulari» bezala, ez «bitartekari» gisa. Berak hasieran ezezkua eman arren, haien estutasuna ikusita «ETakoak ez ziren pertsonen aurrean» egin zuen. Horren bitartez, 'zerga' eskatzen zutenen eta enpresarien arteko kontaktua gauzatu zen. «Ni ETA eta estorsionatzailearen arteko harremanetik kanpo gelditu nintzen», zehaztu zuen.

Hala ere, Eusko Jaurlaritzako Barne Sailak azaldu duenez, kasu horretako Iruinen partaidetza ez zen «interesik gabekoa» izan. Barne Sailaren arabera, enpresarien eta 'zerga' eskatu zutenen zita akordatu zuen Iruinek. HBko burukideak «estorsionatzaileen alderako» egiten zuen lan, eta haiek «babestu» zituen gainera. / 5



MADRILEKO atentatuan herenegun hildako bost lagun hiletak izan ziren atzo. Elizkizunen ostean, Julian Garcia Vargas Espainiako Defentsa ministroak ETaren ekintzak babesten dituztenen aurkako neurri judizialak hartu beharra aipatu zuen. «Terroristak lagundu eta justifikatzen dituztenak eta

mehatxatzen digutenak behingoz prozesatzea» izan behar du Estatuko fiskal nagusiaren zeregina, esan zuen Defentsa ministroak. Iluntzean, atentatua gaitzesteko kontzentrazioa izan zen Madril. Deialdi horretan «ETakoak hil!» bezalako oihuak nagusitu ziren bildutako jendetzaren artean. / 4

Esnalen dimisioa eskatu dute EA, HB eta EUEk Gipuzkoan

Josu Esnal Gipuzkoako Batzar Nagusietako lehendakariaren dimisioa eskatuko dute Eusko Alkartasuna (EA), Herri Batasuna (HB) eta Euskal Ezkerrak (EUE), Diputazio-ko oposizioan dauden alderdiek (beren botoak batuz gero nagusi dira). Idazki bateratua aurkeztu zuten atzo hiru alderdiek dimisioa eskatzeko. Dimisioa Batzarretara eramango dute, eta bertan bozketa egitea eskatu dute.

Esnalek Gipuzkoako aurrekontuen eztabaidan aurrekontuak bozketa batean atzera botatzeko aukera

baztertu zuen, eta oposizioak aurkeztutako emendakinak banan banan eztabaitzea erabaki zuen. Honek EA, HB eta EUEren lehen asmoa zapuztu zuen, ez bait zuten emendakin bateraturik aurkeztu. Batak bestearenari botoa ematera behartuta zeuden, EAJ eta PSOEek prestatutako aurrekontuak atzera botatzekotan. EAJ eta PSOEek 21 batzarkide dituzte, eta oposizioak 28, PPko biak zenbatzeko. Eli Galdos jeltzalearen aginte taldea kinka estuan dago, beraz, oposizioak behin baino gehiagotan bat egiteko prest dagoela bait dirudi. / 7

EGUNKARIArekin elkartasuna

Elkartasun dei asko jaso ditu egunotan-EGUNKARIAk Juan Mari Atutxa Euskal Autonomi Elkarteko Barne sailburuak EGUNKARIAri buruz Legebiltzarrean egindako baieztape-nak direla eta. Elkartasun horren adierazle gisa, EGUNKARIAN kolaboratzen duten lagun batzuk sinatutako agiria jaso dugu gaurko edizio honetan. Mila esker gutun eta sinadura bidez EGUNKARIArekiko elkartasuna erakusten ari zareten guztioi.

BESTERIK

POLITIKA

Alli eta Gonzalez astelehenean bilduko dira Madril / 6

GIZARTEA

Buesak «EHUren kontrolik ezaz» justifikatu zituen aurtengo aurrekontuak Leioan / 8

NAZIOARTEA

Europako Batasun Hitzarmena sinatuta / 16